

REVISTA SITUASAUN – DEZEMBRU 2016

ASUNTU NE'EBÉ PRESIZA TAU ATENSAUN

- ▶ **Númeru Insidente Violénsia Tun Iha Dezembru 2016, Maibé Insidente Sériu Rejista ho Númeru Aas**
- ▶ **Insidente Violénsia Tanba Hemu Tua Lanu Sa'e Maka'as Iha Dezembru**
- ▶ **Insidente Violénsia 10 Liga ho Grupu Arte Ritual, Eis-Grupu Arte Marsial**

NÚMERU INSIDENTE VIOLÉNSIA TUN IHA DEZEMBRU 2016, MAIBÉ INSIDENTE SÉRIU REJISTA HO NÚMERU AAS

Belun ho nia Sistema Atensaun no Responde Sedu (AtReS) iha fulan Dezembru 2016 rekolla dadus insidente violénsia hamutuk 105. Númeru ne'e konsidera tun kompara ho fulan hirak liu ba. Razaun balun ne'ebé konsidera nudár fatór, nune'e insidente tun mak hanesan:

- Patrollamentu Polísia Nasionál Timor-Leste (PNTL) ho másimu iha tempu natal no tinan foun;
- Kooperasaun entre PNTL no parte Igreja Katólíka ne'ebé bandu halo prezepiu iha fatin públiku, hodi evita no prevene violénsia, no hanoin fali ba insidente lubuk ida ne'ebé akontese iha fulan Dezembru 2015, barak liu maka insidente violénsia akontese iha fatin prezepiu, hanesan hemu tua, rona múzika, provoca malu to'o ikus baku malu no sunu mós prejepeiu balun;
- Postu Administrativu balun antes ne'e sempre rejista insidente, maibé iha Dezembru 2016 la rejista insidente ruma hanesan Postu Administrativu Laga, Munisipiu Baukau.

Maske númeru insidente konsidera tun iha Dezembru 2016, maibé rejista mós insidente violénsia sériu hamutuk 18. Númeru ne'e konsidera aas kompara ho fulan sira antes ne'ebé insidente sériu akontese kuaze 4 to'o 7 kada fulan. Insidente sériu sira ne'e mak hanesan:

Iha Munisipiu Dili akontese insidente 8 - iha Aldeia Karau Mate (Saburaka Laran), Suku Becora, joven sira ho sasán kro'at halo asaltu ba joven ida ne'ebé kauza nia ulun rahun, sona borus garganta, halo matan-fuan naklosu no halo joven ne'e mate; Iha Prizaun Becora, Suku Camea, akontese Guarda Prizaun ida baku prizioneiru mane ida to'o hetan kanek todan no baixa iha HNGV; iha Aldeia Terra Santa, Suku Comoro, akontese ema deskoñesidu na'in rua ho motorizada no katana taa joven ida ne'ebé la'o iha estrada laran, rezulta kanek todan iha kabaas, no insidente hanesan akontese mós iha Área Pantai Kelapa, Suku Fatuhada, ne'ebé ema deskoñesidu taa mane ida iha nia kakorok no kotuk laran;

Totál Insidente Violénsia iha Dezembru 2016	
Munisipiu	Insidente
Aileu	2
Ainaru	4
Baukau	6
Bobonaru	3
Covalima	4
Dili	47
Ermera	7
Lautein	2
Likisá	8
Manatutu	2
Manufahi	12
Oekusi	2
Vikeké	6
Totál	105

Iha Aldeia Moris Foun, Suku Comoro, akontese mane ida baku nia ferik-oan to'o soe bee-ki'ik ho ran, nune'e fetu nia família ba baku fali mane ne'e to'o isin lolon bubu hotu; iha Aldeia Wedalak, Suku Bairru-Pite, akontese ema deskoñesidu sunu família ida nia motorizada 3 iha kalan-boot; iha Aldeia Efaka, Suku Bairru-Pite, akontese ema deskoñesidu sona joven ida iha nia kabun to'o borus no mate fatin kedas bainhira fila husi festa; iha Aldeia Nopen, Suku Vila-Verde akontese bala (kilat-musan) kona fetu ida ne'ebé toba hela iha uma-laran. Família sira mós la hatene katak ne'e bala tanba momentu ne'ebé ema mós sunu hela fogete. Família sira tuir mai lori fetu ne'e ba Postu Saúde Vera Cruz no bainhira doutór sira halo operasaun mak hetan bala-musan iha fetu ne'e nia liman.

Iha Munisipiu Manufahi akontese insidente 3 - iha Aldeia Umaluli, Suku Babulu, Postu Administrativu Same akontese membru PNTL baku joven mane ida to'o kanek todan tanba nia abuza no tolok membru PNTL ne'ebé ba halo atuasaun ba problema; iha Suku Holarua, Postu Administrativu Same akontese grupu joven asaltu joven ida iha nia uma ho sasán kro'at to'o kanek todan; iha Suku Clacuc, Postu Administrativu Fatuberliu akontese fetu ida baku nia alin fetu ho fatuk iha nia ulun to'o kanek grave tanba nia alin uza verbal ho liafuan ladi'ak hodi hasoru nia bin.

Iha Munisipiu Baukau akontese insidente 2 - iha Suku Buibau, Postu Administrativu Baukau akontese estudante na'in rua sona malu bainhira sira ba simu kaderneta iha Eskola; iha Suku Ossoala, Postu Administrativu Vemassee akontese joven sira sona malu tanba lanu.

Iha Munisipiu Likisá akontese insidente 2 - iha Suku Fahilebu, Postu Administrativu Bazartete akontese pesoál PNTL ida baku joven mane ida to'o kanek grave tanba problema privadu; iha Suku Maumeta, Postu Administrativu Bazartete mós akontese pesoál PNTL na'in rua baku malu iha festa agradisimentu ba xefe suku eleitu nian.

Iha Munisipiu Vikeké akontese insidente 2 - iha Suku Ossu Desima, Postu Administrativu Ossu akontese fetu ida hako'i fetu ida selu iha rai kuak-laran, maibé la mate no ema ne'ebé hein karau mak hetan fali; iha Suku Caraubalo, Postu Administrativu Vikeké akontese mane ida taa nia alin rasik ho katana no mate iha fatin, hafoin sira hemu tua hamutuk.

Iha Munisipiu Bobonaru akontese insidente 1 - iha Suku Balibo, Postu Administrativu Balibo katuas ida (karau na'in) taa katuas ida seluk (toos na'in) to'o kanek todan tanba katuas toos na'in ho diman sona kanek karau ne'ebé tama iha ida seluk nia toos-laran.

INSIDENTE VIOLÉNSIA TANBA HEMU TUA LANU SA'E MAKAS IHA FULAN DEZEMBRU

Sistema AtReS iha Dezembru 2016 mós rekolla insidente violénsia hamutuk 42 tanba hemu tua lanu. Númeru ne'e konsidera aas liu kompara ho númeru average (rata-rata) durante fulan 12 ikus (Dezembru 2015 – Novembru 2016) ho insidente 25.1 kada fulan. Insidente tanba hemu tua lanu iha Dili akontese insidente 15, Manufahi insidente 7, iha Baukau, Ermera no Likisá ida-idak insidente 4, iha Bobonaro no Covalima ida-idak akontese insidente 2 no iha Aileu, Lautein, Manatutu no Vikeké ida-idak akontese insidente 1.


INSIDENTE VIOLÉNSIA 10 LIGA HO GRUPO ARTE RITUAL, GRUPO ARTE MARSIAL

Sistema AtReS mós iha Dezembru 2016 rekolla insidente violénsia hamutuk 10 liga ba Grupu Arte Ritual (GAR) no Grupu Arte Marsial (GAM). Maske númeru ne'e konsidera tun kompara ho fulan Outubru no Novembru maibé tuir observasaun AtReS, loloos númeru ne'e bele aumenta maibé fonte informasaun sira mak difisil atu deside insidente ne'ebé akontese iha relasaun ho grupu sira ne'e ka lae, tanba joven sira kahur malu liu iha tempu feriadu, tempu natal no tempu atu tama ba tinan foun, nune'e sira lakohi si'ik insidente ne'ebé akontese iha relasaun ho GAM no GAR.


Insidente liga ba Grupu Arte Marsial (GAM) no Grupu Arte Ritual (GAR) mak hanesan: **Iha Dili akontese insidente 7** - iha Bairru-Pite akontese insidente 2, iha Bairru Usindo Dois, ne'ebé membru GAR 1 amesa família ida atu oho no sunu sira nia uma depois insidente kontinua ho tuda malu no uza fatuk kona família ne'e nia uma; iha Aldeia Ribeira Maloa akontese insidente 2 ne'ebé membru eis GAM sira baku no tuda malu depois amesa malu ho katana; iha Haslaran, Becora, membru GAR baku joven ida tanba nia sadik fali membru GAR ne'e; iha Aldeia Zero-Cinco, Fatuhada, eis GAM baku no tuda malu nune'e halo comunidade sira ta'uk, akontese mós insidente hanesan iha Sao Miguel, Comoro no iha Aldeia Zero-Um, Mascarinhas. **Iha Baukau akontese insidente 2** - iha Buibau, membru eis GAM sona malu; iha Tirilolo, eis GAM baku no tuda malu rezulta prejepiu ida hetan estragu. **Iha Likisá akontese insidente 1** - iha Lauhata, Bazartete, eis GAM sadik fali GAM (grupu Arte Marsial ne'ebé ativu) to'o ikus baku malu no rezulta ida hetan kanek.

KARATERÍSTIKA INSIDENTE


Total Insidente: Dezembru 2016




Insidente Fatin




Tipu Violensia




Metodu Violensia



Hun no Abut Konflitu



See Mak Hahu / Halo Violensia?




Ema Ne'ebe Hahu Violensia Nia Jeneru saida?




Vitima Nia Jeneru



See Mak Responde?



Impaktu



ATIVIDADE PREVENSAUN NO RESPONDE BA KONFLITU

Atividade Ne'ebé Hala'o Husi Ekipa Sistema Atensaun no Responde Sedu (AtReS)

- ▶ Belun liu husi Sistema Atensaun no Responde Sedu (AtReS) kapasita ona Koordinador Munisipiu na'in 13 no Jestor Programa AtReS atu halo monitorizasaun ba insidente violénsia eleitorál iha eleisaun jerál 2017. Treinamentu ne'ebé hala'o iha loron 5-6 Dezembru 2016 iha Hotel Vila-Verde ne'e fasilita husi Komisaun Nasionál Eleisaun (CNE) no Provizóriu Direitus Umanus no Justisa (PDHJ).



- ▶ Atu hasa'e Monitorizador sira nia kapasidade no koñesimentu liga ba violénsia eleitorál, Belun liu husi Sistema Atensaun no Responde Sedu (AtReS) mós oferese ona treinamentu atu desenvolve Monitorizador sira nia kapasidade, molok halo monitorizasaun ba eleisaun prezidensiál no eleisaun parlamentár 2017. Treinamentu ne'ebé hala'o iha Salaun Komisaun Nasionál Eleisaun Colmera Dili husi loron 12 – 14 Dezembru 2016. Partisipa husi Monitorizador 86, husi Postu Administrativu 43 (Postu Administrativu ne'ebé Sistema AtReS halo kobertura).



- ▶ Ekipa Belun partisipa enkontru iha Gabinete Primeiru Ministru hodi halo debate proposta Lei liga ho krime uza sasán kro'at hanesan rama ambon ne'ebé liga ho Grupu Arte Marsiál (GAM) no Grupu Arte Ritual (GAR) sira. Enkontru ne'e hala'o iha loron 28 Dezembru 2016 iha Palacio Governu Dili.

Atividade Ne'ebé Hala'o Husi Ekipa Programa Apoiu Polisiamentu Komunitária (PAPK)

- ▶ PNTL hamutuk ho Belun organiza enkontru Trimestral Representante Feto Konsellu Polisiamentu Komunitária (Feto KPK) ne'ebé mak representa husi feto rua iha Munisípiu Manufahi, Likisá no Covalima ;
- ▶ Iha loron 15 Dezembru 2016, PNTL hamutuk ho Belun organiza enkontru Trimestral Konsellu Seguransa Munisipiu (KSM) iha Munisipiu Manufahi;
- ▶ Enkontru regular KPK hala'o iha Suku 3 iha Dili, Suku 2 iha Likisá, Suku 4 iha Vikeké, Suku 7 iha Manufahi (Belun apoiu Suku 5 no PNTL apoiu Suku 2) no suku 2 iha Covalima.

Atividade Ne'ebé Hala'o Husi Ekipa Mediasaun no Rezolusaun ba Disputa Rai (MRDR)

- ▶ Iha loron 13 Dezembru 2016 iha Ofisiu Koordinador Rezidente Nasaun Unidus nian, Belun asina akordu parseria ho UNDP liu husi Klínika Asesu ba Justisa. Akordu parseria ne'e atu implementa "Projetu Hadi'ak Asesu Justisa ba Komunitade ho Mediasaun no Rezolusaun Konflitu ba Komunitade". Projetu ne'e sei implementa hahú Janeiru to'o Setembru 2017 ho responsavel husi ekipa xave programa Belun ba Mediasaun no Rezolusaun Disputa ho kolabora besik ho Parseiru Defensór Públiku iha Munisipiu Judisiál Baukau no Suai.

KONA-BA REVISTA NE'E

Revista situasaun ne'e relata kona-ba asuntu xave relaciona ho insidente violénsia no tendénsia konflitu husi koleasaun dados monitorizasaun liuhosi Sistema Atensaun no Responde Sedu (AtReS), ne'ebé kobre iha Postu Administrativu 43, husi Postu Administrativu 65, Suku 208 iha Timor-Leste durante fulan Dezembru 2016. Belun esforsu atu fahe informasaun ne'ebé up-to-date no serteza ho dados atuál. Hanoin katak, bele hetan mudansa situasaun ho lalais husi kontribuisaun dame ita hotu nian. Ami agradese no simu informasaun seluk ne'ebé bele klarifika ka update dados, liuhosi sistema AtReS.

Marilia Oliveira da Costa, Jestor Sistema AtReS: bylah.belun@gmail.com

Laurensius Lein, Especialista Prevenção Konflitu & Política: laurensius.belun@gmail.com